

ՄԱՆՐՈՒՔ

ԼԵՒՈՆ ՄԱՆՈՒԷԼԵԱՆՑԻ

I

Դարձեալ իմ մուսան եկաւ այցելեց
Նախկին սիրեցեալ իւր բարեկամին.
Եւ սիրտըս նորից նորից տըրտփեց,
Աչքերըս նորից փայլատակեցին:

Օ', անգի՛ն մուսա, քեզ հազա՛ր ողջոյն,
Ձեզ հազա՛ր ողջոյն, ոսկի՛ երազներ.
Իսկ դո՛ւ, աշխատա՛նք, և դո՛ւք, իմ հոգսե՛ր,
Կը խընդրեմ ինձնից հեռանաք իսկոյն:

II

Չափազանց շատ իղձ ու յոյսեր
Կուտակեա՛ծ են իմ սըրտում.
Նոցա՛ ես միշտ օր ու գիշեր
Քաղցրիկ օրօր եմ ասում:

Բայց կարծես բանտ նոքա ընկա՛ծ
Աղաչում են—ազատեմ.
Եւ ես անզօր, տարակուսեա՛ծ
Ձը գիտեմ թէ ի՛նչ անեմ:

Ահա տեսե՛ք—իմ աչքերից
Արցունքներ են կաթկաթում—
Այն իմ սըրտից, իմ խեղճ սըրտից,
Իղձ—յոյսերս են բաժանում:

Մօսկւա. 1889 թ.: